



MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E O O CONCELLO DE BOIMORTO PARA A EXECUCIÓN DO PROXECTO DE MELLORA INTERIOR E AMOBLAMENTO DO XIMNASIO DO CONCELLO

I. Departamento que tramita o convenio

A Consellería de Presidencia, Xustiza e Deportes é o departamento ao que lle corresponde a elaboración, proposta e execución da política do Goberno galego en materia de Administración Local, de conformidade co previsto no Decreto 136/2024, do 20 de maio, polo que se establece a estrutura orgánica da Consellería de Presidencia, Xustiza e Deportes (DOG núm. 101 do 27 de maio).

II. Antecedentes

A Xunta de Galicia, a través da Consellería de Presidencia, Xustiza e Deportes, ten previsto asinar un convenio de cooperación co Concello de Boimorto para a execución do proxecto de mellora interior e amoblamento do ximnasio do concello, que abrangue os anos 2025 e 2026.

O Decreto 136/2024, do 20 de maio, polo que se fixa a estrutura orgánica da Consellería de Presidencia, Xustiza e Deportes, é o departamento da Xunta de Galicia ao cal lle corresponde a elaboración, proposta e execución da política do Goberno galego en materia de Administración local.

Os artigos 194 e 195 da Lei 5/1997, do 22 de xullo, de administración de Galicia, establecen que, no que atinxe ás relacións coas entidades locais galegas, correspóndenlle á Xunta de Galicia ás competencias de cooperación e colaboración, podéndose estas materializarse mediante a subscripción de convenios.

Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local, e 80 e 81 da LALGA, os concellos deberán prestar á súa cidadanía os servizos públicos que contribúan a satisfacer as necesidades e aspiracións da veciñanza, entre os que se atopan a promoción do deporte e instalacións deportivas e de ocupación do tempo libre.





III. Finalidade

Para os efectos sinalados, tense previsto formalizar co concello de Boimorto o instrumento convencional a que se refire a presente memoria, cunha duración que abrangue dende a súa sinatura ata o 31 de decembro de 2026.

IV. Obxecto do convenio

Este convenio ten por obxecto fixar as liñas de colaboración entre a Consellería de Presidencia, Xustiza e Deportes e o Concello de Boimorto para a execución do proxecto de mellora interior e amoblamento do ximnasio do concello nos anos 2025 e 2026.

V. Fundamentos do convenio

O Concello de Boimorto manifestou a necesidade de asistencia por parte da Consellería de Presidencia, Xustiza e Deportes para a realización da mellora interior e amoblamento do ximnasio do concello.

O edificio onde se sitúa o ximnasio de Boimorto era o edificio da antiga cámara agraria e nave anexa. Actualmente este espazo diáfano encóntrase cunhas instalacións interiores que precisan dunha actuación e modernización.

Algúns dos principais motivos sobre a utilidade pública do ximnasio, de interese social e educativo e humanitario son os seguintes:

1. O ximnasio municipal é un servizo básico de apoio ao benestar da poboación, ao facilitar o acceso á práctica regular da actividade física. O deporte contribúe a mellorar a condición física, aumentar a enerxía diaria e previr problemas de tipo cardiovascular, metabólico e músculo-esquelético, favorecendo así unha vida mais activa e saudable para toda a veciñanza.
2. A mellora das instalacións permitirá ofrecer programas adaptados a diferentes colectivos (persoas maiores, mocidade, persoas con mobilidade reducida ou diversidade funcional) garantindo a accesibilidade universal e a igualdade de oportunidades.
3. O ximnasio constitúe un axente social dinámico, ao ser un espazo de convivencia interxeracional e intercultural, no que diferentes grupos da comunidade poden compartir actividades saudables.
4. O acceso a un ocio activo e inclusivo contribúe a reducir a brecha social, evitando situacións de illamento, exclusión ou sedentarismo. Neste sentido, os ximnacios municipais son ferramentas que axudan a mitigar as carencias, a fomentar a integración social e a fortalecer o tecido comunitario.
5. O ximnasio é tamén un espazo educativo no que a poboación adquire hábitos de vida saudables e valores asociados ao esforzo, disciplina, cooperación e respecto. Para persoas con necesidades especiais ou en situación de vulnerabilidade, o acceso a actividades deportivas adaptadas constitúe unha ferramenta esencial, favorecendo a





súa inclusión, mellorando a autoestima e garantindo o dereito a unha vida activa e digna.

6. O ximnasio municipal é un servizo demandado pola poboación, polo que resulta necesario levar a cabo as actuacións que se describen neste convenio para poder ofrecer unha mellora deste servizo á cidadanía en condicións de calidade, atendendo ás súas necesidades e contribuíndo á mellora da saúde e do benestar da veciñanza.

Por todo o exposto, a mellora do ximnasio permitirá fomentar uns hábitos de vida saudables, garantir unha maior cohesión social e incrementar a calidade de vida no medio rural. Ademais, contribuirá ao desenvolvemento económico do territorio galego, ofrecendo igualdade de oportunidades a toda a poboación, con independencia do seu lugar de residencia. Esta iniciativa reforza tamén o papel do Concello de Boimorto como administración próxima e dinamizadora, converténdoo nun verdadeiro motor de desenvolvemento e benestar para a cidadanía.

Así pois, este convenio de colaboración responde ao interese público e social que representa a acción de fomento da Consellería de Presidencia, Xustiza e Deportes respecto da execución dunhas actuacións necesarias para o normal funcionamento da entidade local, que lle permitan exercer as competencias e prestar os servizos que a normativa básica en materia de réxime local lles atribúe aos concellos, como Administración máis próxima aos administrados.

A conxuntura descrita, a necesidade de asistencia manifestada polo Concello e o obxectivo da actuación, así como a existencia de crédito adecuado e suficiente para a súa aplicación eficaz no restablecemento dos servizos municipais sobre os cales se actuará a través do convenio que se pretende subscribir, acreditan a existencia de razóns de interese público que xustifican o feito de recorrer ao procedemento excepcional de concesión directa dunha subvención a favor do Concello de Boimorto.

Conforme co establecido no artigo 26.2º da Lei 9/2007, do 13 de xuño, de subvencións de Galicia, faise constar que neste convenio non son de aplicación os principios de publicidade e concorrancia pública, xa que o obxecto do convenio é atender as circunstancias específicas dese concello para a mellora das infraestruturas municipais.

Incorpórase ao expediente declaración xustificando a imposibilidade de promover a concorrancia pública, de acordo co establecido no citado artigo 26.2º.

Polo exposto, considérase xustificada a utilización do instrumento convencional para articular as actuacións de referencia, quedando o dito convenio fóra do ámbito de aplicación da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014 con independencia de que, ao abeiro do previsto no artigo 4 da dita norma, lle sexan de aplicación os principios desta lei para resolver as dúbidas e lagoas que se poidan presentar.





VI. Actuación da subvención

Actuacións que se encadran no proxecto de obras de mellora interior e amoblamento:

- substitución das carpintarías na planta baixa da fachada principal por outras con rotura de ponte térmico
- creación de novos vestiarios por xénero e accesibles
- renovación dos revestimentos interiores con trasdosados interiores, falso teito e pavimento deportivo
- actualización de todas as instalacións que sofren modificacións e,
- renovación do equipamento interior con diferentes máquinas

As actuacións descritas permitirán poñer en marcha a mellora do ximnasio municipal, situado no casco urbano do concello, sendo un lugar de encontro, saúde, comunicación e participación cidadá.

VII. Importe e aplicación orzamentaria

O importe total das actuacións a realizar ao abeiro deste convenio ascende á cantidade de cento trinta e nove mil novecentos noventa e cinco euros con cinco céntimos (139.995,05 €) IVE incluído, segundo a memoria detallada e valorada que se xunta como anexo I ao convenio, que se fará efectivo durante os anos 2025 e 2026.

Para dar cumprimento aos obxectivos deste convenio a Consellería de Presidencia, Xustiza e Deportes, a través da Secretaria Xeral Técnica, achegará a cantidade máxima de **cento vinte mil euros (120.000 €) IVE** incluído, con cargo á aplicación orzamentaria **05.01.121A.760.0**, código de proxecto **2015 00088**, distribuída do seguinte xeito:

- Ano 2025: 45.000 €
- Ano 2026: 75.000 €

Esta cantidade representa o 85,72 % do orzamento total do proxecto que constitúe o obxecto deste convenio.

O concello de Boimorto, achegará o 14,28 % do importe total do proxecto, que ascende a **dezanove mil novecentos noventa e cinco euros con cinco céntimos** (19.995, 05 €) IVE incluído, da correspondente partida dos seus orzamentos, distribuída do seguinte xeito:

- ano 2025: 9.997,53 €
- ano 2026: 9.997,52 €

VIII. Polo exposto, considérase xustificada a utilización do instrumento convencional para articular as actuacións de referencia, quedando o dito convenio fóra do ámbito de aplicación da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as directivas do Parlamento





Europeo e do Consello 2014/23/UE e 2014/24/UE, do 26 de febreiro de 2014 con independencia de que, ao abeiro do previsto no artigo 4 da dita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, na data da sinatura dixital

O secretario xeral técnico
Francisco Javier Abad Pardo

